

## **МЕСЯЦА ДЕКЕМВРИЯ В 26-Й ДЕНЬ.**

**НЕДЕЛЯ ПО РОЖДЕСТВЕ ХРИСТОВОМ. ПАМЯТЬ СОТВОРЯЕМ СВЯТЫХ ПРАВЕДНЫХ ИОСИФА ОБРУЧНИКА, И ДАВИДА ЦАРЯ, И ИАКОВА, БРАТА ГОСПОДНЯ**

Подобает ведати, аще по Рождестве Христове Неделя сия случится в 26-й, и в 27-й, и в 28-й, и в 29-й, и в 30-й день: В субботу на малой вечерни стихиры воскресны, и Богородицы по обычаю.

### **НА ВЕЛИЦЕЙ ВЕЧЕРНИ**

По обычном псалме поем кафизму 1-ю всю. На Господи, воззвах: стихиры воскресны 3, и праздника 4, поемья на самый праздник, и святых 3, глас 1.

Подобен: Небесных чинов:

**Б**огоотца вси восхвалим, Давида царя, \* из него бо пройде жезл – Дева. \* И из Нея возсия цвет – Христос, \* и Адама со Евою от тли воззва, \* яко Благоутробен.

**П**ророческая проречения виде в старости \* яве Иосиф Обручник, \* проявленно исполняемая, \* обручение воистинну странное, \* откровение Ангелы прием, \* Богу слава, вопиющих, \* на землю мир низпославшему.

**Б**рата Божия вси восхвалим, \* яко святителя суца, \* мучением же паки просиявша доблественне. \* Егоже молитвами, Иисусе Боже наш, \* в вертепе и в пеленах повивыйся, \* спаси вся, поющия Тя.

Слава, глас 6:

**П**амять совершаем Давида и Иакова благочестивых, \* царя пророка и апостола, первого епископа: \* тех бо ученьми лести избавльшеся, \* Христа славословим, от Девы возсиявшаго и воплощшагося, \* еже спасти души наша.

И ныне, Богородичен гласа.

Вход. Прокимен дне.

На литии стихиры праздника, поемья на самый праздник. Слава, и ныне: Волсви персидстии:

На стиховне стихиры воскресны.

Слава, глас 6:

**С**вященных память, и царей держава, \* и веселие бысть Рождество Твое, \* и в нем, хвалящеся, глаголем: \* Отче наш, Иже еси на Небесех, \* да святится Имя Твое, Человеколюбче.

И ныне, глас тойже:

**Д**несь невидимое Естество \* человеком от Девы совокупляется; \* днесь безмерное Существо в Вифлееме пеленами обвивается; \* днесь Бог звездою волхвы в поклонение приводит, \* провозвещающая Свое тридневное погребение, \* яко в злате, и смирене, и ливане. \* Емуже поем: \* воплотивыйся от Девы, Христе Боже, \* спаси души наша.

На благословении хлебов тропарь Тропарь, глас 4:

**Р**ождество Твое Христе Боже наш, \* возсия миру свет разума: \* в нем бо звездам служащий, \* звездою учахуся, \* Тебе кланяться Солнцу правды, \* и Тебе ведети с высоты Востока: \* Господи слава Тебе. [Дважды]

И святых, глас 2, единожды.

Благовестуй, Иосифе, Давиду чудеса, Богоотцу: \* Деву видел еси рождшую, \* с пастыри славословил еси, \* с волхвы поклонился еси, \* Ангелом весть прием. \* Моли Христа Бога спасти души наша.

А идеже несть всенощнаго бдения, на повечерии по трисвятом кондак Богоотцев.  
Слава, и ныне, праздника.

## НА УТРЕНИ

На Бог Господь: тропарь воскресен, дважды. Слава, святых. глас 2, единожды.

Благовестуй, Иосифе, Давиду чудеса, Богоотцу: \* Деву видел еси рождшую, \* с пастыри славословил еси, \* с волхвы поклонился еси, \* Ангелом весть прием. \* Моли Христа Бога спасти души наша.

И ныне, праздника, глас 4:

Рождество Твое Христе Боже наш, \* возсия миру свет разума: \* в нем бо звездам служащий, \* звездою учахуся, \* Тебе кланяться Солнцу правды, \* и Тебе ведети с высоты Востока: \* Господи слава Тебе.

По кафизмах, седальны воскресны, с Богородичны их. И чтение во Евангелии толковом от Матфея, Неделя по Рождестве Христове; или слово Григория Нисскаго о Святей Троице и о Аврааме, на две части. И поем непорочны, и тропари их. Ипакоей гласа. Степенна и прокимен гласа. Евангелие воскресное. Воскресение Христово видевше: По 50-м псалме стихира воскресна.

Канон воскресен со irmosом на 4, и Богородице на 2, и праздника на 4, и настоящий канон на 4, глас 4. Творение Космы монаха.

### Песнь 1

**Ирмос:** Воспою Тебе, Господи Боже мой, \* яко извел еси люди из работы египетския, \* покрыл же еси колесницы фараоновы и силу.

Елицы рождественная сотворяем Воплощагося нас ради, радостию воспоем Иакова Богобрата и Давида Богоотца.

Слава в Вышних, лица ангельстии в Вифлееме Иосифу предсташа, глаголюще, с нимиже Благоизволившаго воплотитися воспоем.

Давиде Богоотче, с гусльми, от корене Иессеова воплощася Господа, Иакова праведнаго привлек, воспой.

Воспою Тебе, Господи Боже мой, яко родился еси из Матере Девы Святыя и Сию показал еси надежду душ наших.

**Катавасия:** Христос рождается:

### Песнь 3

**Ирмос:** Утверждение на Тя надеющихся, Христе Боже, \* в вере Православней Твоей утверди нас, \* яко Человеколюбец.

Рождшагося плотию от Девы без семени Христа Бога со Ангелы вси воспоем, слава в Вышних Богу, взывающе.

Все праздниственный нас ради Истощившагося, вернии, праздник с Давидом же и Иаковом песньми по достоянию почтим.

Яко жениху от чертога, из матерних ложесн Давид рече Господу изыти, Егоже ныне со Иаковом воспоем.

**Богородичен:** Безвестную и Богородицу Марию почтим: Тоя бо ради нам возсия Правды Солнце.

Кондак праздника, глас 3:

Дева днесь Пресущественнаго рождает, \* и земля вертеп Неприступному приносит. \* Ангели с пастырьми славословят, \* волсви же со звездою путешествуют: \* нас бо ради родися \* Отроча Младо, Превечный Бог.

**Икос:** Едем Вифлеем отверзе, приидите, видим, пищу в тайне обретохом; приидите, примем сушая райская внутрь вертепа: тамо явися корень ненапоен, прозябая отпущение; тамо обретеса кладязь неископан, из Негоже Давид пити древле возжадася; тамо Дева, рождши Младенца, жажду устави абие Адамову и Давидову. Сего ради к Нему идем, где родися Отроча Младо, Превечный Бог.

**Седален, глас 3.**

**Подобен:** Дева днесь:

**Иосифа** праведнаго, Девы обручника, \* с Давидом Иакова достодолжно воспоем: \* сии бо, праведною ходивше стезею, достигоша Небесныя обители, \* достойно ликующе со Ангелы, \* нам просят согрешений оставление.

**Слава, глас и подобен тойже:**

**Дева** роди Творца всяческих, \* и волсви грядут Сему плотию поклонитися; \* человецы со Ангелы славословят; \* вертеп же и ясли дароносят, \* воспевающе рождагося Отроча Младо, Превечнаго Бога.

**И ныне, глас 1.**

**Подобен:** Лик Ангельский:

**Лик** пророческий празднует Божественне чудо, в Тебе бывшее, о Дево! \* Бога бо, воплощася на земли, породила еси. \* Темже Ангели с пастырьми поют, \* волсви же верою со Иосифом вопиют Давиду чудеса, Богоотцу.

**Песнь 4**

**Ирмос:** Твоего на земли явления, Христе Боже, \* проповедаая пророк пришествие, \* с веселием вопияше: \* слава силе Твоей, Господи.

**С** волхвы Рождшемуся поклонимся и со Ангелы и Иосифом ликуим, боголепно зывающе: слава в Вышних Христу Богу.

**Царствующий** всеми царьми Христос, по плоти от семене Давидова рождейся, избраннаго Иакова прият, брата, якоже изволи.

**От** Девы Господь явивыйся во плоти, спрослави память вашу, святии, апостолов лучший, Иакове, и Давиде всеблаженне.

**Богородичен:** Херувимских чинов преимущи и Бога, на руку носима, с плотию понесши, радуйся, Богородице Безневестная.

**Песнь 5**

**Ирмос:** Возсиявый Свет, \* и просветивый утро, \* и показавый день, \* слава Тебе, слава Тебе, \* Иисусе, Сыне Божий.

**От** Девы Чистыя благоволивый родитися, Боже воплотивыйся, слава Тебе, слава Тебе, Иосиф вопияше.

**От** Девы рождейся и память уяснивый Давида и Иакова, слава Тебе, слава Тебе, Иисусе, Сыне Божий.

**Егоже** пророк Давид Дождь на Руно нарицаше Богодохновенно, Иаков проповеда Иисуса, Сына Божия.

**Богородичен:** Ангела глас немолчно тварь приносит Тебе, Дево: радуйся, Мати Чистая Иисуса, Сына Божия.

## Песнь 6

**Ирмос:** **Возопи, прообразуя погребение тридневное, \* пророк Иона, в ките моляся: \* от тли избави мя, Иисусе, Царю сил.**

**Предстояху,** ужасающися, чини Небеснии вертепу и Рождество пречистое воспеша немолчно: слава в Вышних Богу рождшуся.

**Сел** еси на Престоле, якоже клялся еси, Владыко, пророку Давиду, от Плода чрева Его прошед, Иакову же Церкви предал еси престол, Христе.

**Царь** убо Давид, и пророк чуден, и праотец показася Божественнаго воплощения, первоепископ же ученик Иаков Иисусов.

**Богородичен:** **Молимся,** о рабех Твоих, Дево Богородице, из Тебе Воплощеннаго моли, яко Тя и Едину Предстательницу нашу вемы.

**Кондак, глас 3.**

**Подобен:** Дева днесь:

**Веселия** днесь Давид исполняется Божественный, \* Иосиф же хваление со Иаковом приносит: \* венец бо сродством Христовым приемше, радуются, \* и неизреченно на земли Рождагося воспевают, и вопиют: \* Щедре, спасай Тебе чтущия.

**Икос:** **Неизреченным** советом раждается плотию, Безплотный описуется ныне телом, неописанный, и спасает непреложно оба существа; начало приемлет, Иже естеством Безначальный и Един Безлетен; зрится Младенец, Сый всесовершенный; носится руками, носяй всяческая. Темже Того сродством почтенныя яко Бог венчает Своим Рождеством, яже прославляюще верою, немолчно вопием: Щедре, спасай Тебе чтущия.

## Песнь 7

**Ирмос:** **Авраамстии** иногда в Вавилоне отроцы \* пещный пламень попраша, \* песнями взывающе: \* отец наших Боже, благословен еси.

**Паче** слова Рождеству Богородицы Марии лица Ангельстии дивящися, Иосифу вопияху: в Вышних слава, и на земли мир.

**Невестоводец** убо Давид, чертожник же Божественныя Церкви Иаков бывше, глаголаху: воплощйся нас ради, Боже, благословен еси.

**Иже** во пророцех царь и во царех пророк, со Иаковом Богомудрым и нам воспой: воплощйся нас ради, Христе, благословен еси.

**Богородичен:** **В** неопальной купине и росодательней пещи Ты прописавшися, Мати Пречистая, без семене родила еси воплощеннаго Бога, Присноблагословенная.

## Песнь 8

**Ирмос:** **Царя** Христа, \* Егоже исповедаша плененнии отроцы, \* в пещи глаголюще велиим гласом: \* вся дела, пойте Господа.

**Воплощшагося** Христа, Егоже славословиша Небесныя силы и Иосиф обручник непрестанно воспевае: вся дела, Господа пойте и превозносите Его во веки.

**Воплощшагося** Христа, Егоже прорече Давид Богоотец и людем проповеда Иаков, вопия: вся дела, Господа пойте и превозносите Его во веки.

**От Девы** рождагося Христа и возвеличившаго Давидову и Иакову священиую память, яко другов Его, вся дела, Господа пойте и превозносите Его во веки.

**Богородичен:** Царя Христа, Егоже нам роди Богородица Мария, и по Рождестве пребысть Дева Чистая, вся дела, Господа пойте и превозносите Его во веки.

**На 9-й песни поем: Честнейшую:**

### **Песнь 9**

**Ирмос:** Моисей на горе неопалимую купину виде, \* Иосиф в вертепе неизреченное Рождество слыша, \* Нескверная Дево, \* Безмужная Мати, \* песнями Тя, Богородице, величаем.

**Рождемуся** от Девы вся тварь трепетом послужи: Небеса убо звездою, земля же ясьми, гора вертепом, волсви дарми, пастырие чудесем, Ангели же слава в Вышних Богу.

**Царь** от пастырей древле убо Давид бысть, от колена же Иудова и царскаго ты, Иакове, пастырь паствы показался еси Воплощшагося, Агнца Вышняго и Сына Божия.

**Вифлееме,** ныне веселися, град быв Новаго Давида, и Сионе, возвещай Церквей старейшинство, общее веселие, всех Царя, и Того угодники ныне восприемши.

**Богородичен:** Ангельстии собори Тя, Богородительнице, славят, и человеческий род Тя непрестанно песнями почитает, Ты бо Божественным Рождеством земныя с Небесными совокупила еси. Темже Тя почитаем.

**Светилен воскресен. Слава, святых.**

**Подобен:** Со ученики:

**Со** Иаковом воспоим, славным Богобратом, Давида Богоотца, \* Иосифа же Божественнаго, Богородицы обручника: \* Христову Божественному Рождеству послужиша во граде Вифлееме боголепно, \* со Ангелы, волхвы же и пастырьми Тому песнь поюще, \* яко Богу и Владыце.

**И ныне, праздника.**

**На хвалитех стихиры воскресны 4 и праздника 4, 4-го гласа, с припевы праздника.**

**Слава, глас 8:**

**Кровь,** и огонь, и курение дыма, \* чудеса на земли, яже провиде Иоиль: \* кровь – воплощение, огонь – Божество, \* курение же дыма – Дух Святый, нашедый на Деву \* и мир облагоухавший. \* Велие таинство Твоего вочеловечения, \* Господи, слава Тебе.

**И ныне:** Преплагословенна еси, Богородице Дево:

**Славословие великое. Тропарь воскресен и отпуст. Стихира Евангельская, час 1-й, и конечный отпуст.**

**На часех тропарь воскресен. Слава, праздника. И ныне, Богородичен. И святых тропарь, прменяюще, глаголем. По Отче наш: кондак праздника и святых, прменяюще, глаголем.**

## НА ЛИТУРГИИ:

Блаженны гласа на 4, и праздника на 4, и святых песнь 6-я на 4.

**Предстояху**, ужасающесе, чини Небеснии вертепу и Рождество пречистое воспеша немолчно: слава в Вышних Богу рождшуся.

**Сел** еси на Престоле, якоже клялся еси, Владыко, пророку Давиду, от Плода чрева Его прошед, Иакову же Церкви предал еси престол, Христе.

**Слава:** Царь убо Давид, и пророк чуден, и праотец показася Божественнаго воплощения, первоепископ же ученик Иаков Иисусов.

**И ныне: Богородичен:** Молимся, о рабех Твоих, Дево Богородице, из Тебе Воплощеннаго моли, яко Тя и Едину Предстательницу нашу вемы.

По входе тропарь воскресен, и праздника, глас 4:

**Рождество** Твое Христе Боже наш, \* возсия миру свет разума: \* в нем бо звездам служащий, \* звездою учахуся, \* Тебе кланяться Солнцу правды, \* и Тебе ведети с высоты Востока: \* Господи слава Тебе.

И тропарь святых. глас 2:

**Благовестуй**, Иосифе, Давиду чудеса, Богоотцу: \* Деву видел еси рождшую, \* с пастыри славословил еси, \* с волхвы поклонился еси, \* Ангелом весть прием. \* Моли Христа Бога спасти души наша.

Слава, кондак святых, глас 3:

**Веселия** днесь Давид исполняется Божественный, \* Иосиф же хваление со Иаковом приносит: \* венец бо сродством Христовым приемше, радуются, \* и неизреченно на земли Рождагося воспевают, и вопиют: \* Щедре, спасай Тебе чтущия.

И ныне, кондак праздника, глас 3:

**Дева** днесь Пресущественнаго раждает, \* и земля вертеп Непреступному приносит. \* Ангели с пастырьми славословят, \* волсви же со звездою путешествуют: \* нас бо ради родися \* Отроча Младо, Превечный Бог.

**Прокимен гласа и святых, глас 4:** Дивен Бог во святых Своих, \* Бог Израилев.

**Стих:** В церквах благословите Бога, Господа от источник Израилевых.

Апостол к Галатом, зачало 200.

**Братие**, сказую вам, Благовествование благовещенное от мене, яко несть по человеку. Ни бо аз от человека приях е, ниже научихся, но явлением Иисус Христовым. Слышасте бо мое житие иногда в жидовстве, яко попремногу гоних Церковь Божию и разрушах ю, и преспевах в жидовстве паче многих сверстник моих в роде моем, излиха ревнитель сый отеческих моих преданий. Егда же благоволи Бог, Избравый мя от чрева матери моея и призвавый благодатию Своею, явити Сына Своего во мне, да благовествую Его во языцех, абие не приложихся плоти и крови, ни вздох во Иерусалим к предним мене апостолам, но идох во Аравию, и паки возвратихся в Дамаск. Потом же по триех летех вздох во

Иерусалим соглядати Петра, и пребых у него дний пятнадцать. Иного же от апостол не видех, токмо Иакова брата Господня.

Аллилуия, глас 4: Помяни, Господи, Давида, и всю кротость его.

Евангелие от Матфея, зачало 4.

Отшедшим волхвом, се Ангел Господень во сне явися Иосифу, глаголя: встав, поими Отроча и Матерь Его, и бежи во Египет, и буди тамо, дондеже реку ти, хошет бо Ирод искати Отрочате, да погубит Е. Он же, встав, поят Отроча и Матерь Его нощию и отыде во Египет. И бе тамо до умертвия Иродова, да сбудется реченное от Господа пророком, глаголющим: от Египта воззвах Сына Моего. Тогда Ирод, видев, яко поруган бысть от волхвов, разгневался зело и, послав, изби вся дети, сущия в Вифлееме и во всех пределах его, от двою лету и нижайше по времени, еже известно испыта от волхвов. Тогда сбьется реченное Иеремием пророком, глаголющим: глас в Раме слышан бысть, плачь, и рыдание, и вопль мног. Рахиль плачущися чад своих и не хотяше утешитися, яко не суть. Умершу же Ироду, се Ангел Господень во сне явися Иосифу во Египте, глаголя: встав, поими Отроча и Матерь Его и иди в землю Израилеву, изомроша бо ищущии души Отрочате. Он же, встав, поят Отроча и Матерь Его и прииде в землю Израилеву. Слышав же, яко Архелай царствует во Иудеи вместо Ирода, отца своего, убояся тамо ити. Весть же приемь во сне, отыде в пределы Галилейския. И, пришед, вселися во граде, нарицаемем Назарет. Яко да сбудется реченное пророки, яко Назорей наречется.

Причастен: Хвалите Господа:

Другий: Радуйтесь: